

makarux ku' ulaqi' nku' Matu'uwal

kiya ku' qutux ka' ulaqi' ni' Yuraw. ralu' niya' ga Yawi'. maqas 'i' Yuraw gi baq 'i' maqiyanux nanaq 'i' Yawi'. muwani la ga, balaiq 'i' musa' 'i' manbabalaiq 'i' kumiyum cu' papatuwawun maha' kumaal 'i' Yuraw. makasawbih cku' ragiyax ku' papatiqan ni' Yawi'. humaynas cu' qutux cu' kabhul cku' kaal ka' aruwa' ku' papatiqan. asikina ga ini tayhuk cu' maymal kahabaag ku' ululaqi' cku' papatiqan ka' hani la. ani ini kapayux ku' ululaqi' cku' papatiqan, ani' musa' 'i' kumiyum cu' papatuwawun i' quwis 'i' yaba' ru' yaya' niya' ga, ini kasapiq cubalay matas 'i' Yawi' .

Yawi' ka' hani ga, balaiq cubalay ku' inlungan niya'. maki 'i' imuwag ga, makarux cubalay ku' ulaqi' ka' hani. ana nanuwan, ana kanuwan mati' cubalay rumag 'i' mi'ing ku' wawwaw na' imuwaag. kiya ku' a'usa' 'i' malahang ka itaal ga ini' niya' laxani uwi. ani ku' suway niya', ani ku' yaki' niya' ru' yutas niya' ga, baqun niya' kalahangan i' kari'ariax. mhngiq ku' papatiqan niya' ga gumlug cku' yaba' niya' 'i' matawwaw i' mamayah ru' qumaluwap i' ragiyax ini ga rumkap cu' qulih cku' luliyung. tiku wawwaw na' qumaluwaap ga, maglug ki' yutas niya' 'i' makibaq ru' kabalay cu' tinmamian. siqasuweg niya' cku' rumaruma' niya'. kahi sipturahuwal na'

itaal kahabaag 'i' Yawi' ka' hani.

balaiq ku' tunux ni' Yawi'. makarux 'i' makibaq, makarux 'i' matas. ana nanuwan ka' wawwaw ga asi niya' patuwawun nanaq. ini mnahmuhmut 'i' makibaq cku' aqih na' rawin. gumu'alu' cu' ana ima' ka' itaal. yani ru' payux ku' rawin niya' la. paqasun ni' nanabakis nku' tinqalangan ku' pintuwawaun niya'.pasibaqan niya' matas ru' pasibaqan niya' uwi cku' gaga' nku' Matu'uwal. kaalun ni' yaba' 'i' Yawi' maha',“ tiku patuwawun su' ka' hani ga, balaiq ru' haylag cubalay. paqasun mi mitaal cku' pintuwawun su' ka' hani, muwani la ga, yani san maha' palhulruhu nku' Matu'uwal cubalay ka' ulaqi'. ”ita' ka Matu'uwal ka' hani ga, makarux ru' haylag cubalay, muwani ku' inlungan niya' ru' maglug cu' cuquliq la ga, naki pasibaqan ta' cu' gaga' nku' Matu'uwal ku' ulaqi' ta' la. mung cubalay cu' kai' ni' yaba', yaya' ru' mati' 'i' rumag 'i' matawwaw cku' imuwaag la ga, ma'usa balaiq ku' kinqiyanux naha' ru' pakabalaiq 'i' lumuhing cku' gaga' nku' Matu'uwal uwi. ara'ruwa' payux ku' ululaqi' nku' tinqalangan ka' marangi 'i' Yawi'. muwani la ga. pa'araruwa' 'i' balaiq ku' tinqalangan ta' la.

勤奮的汶水孩子

Yawi’ 認真向學，就讀偏遠山區的學校。

Yawi’ 木訥有智慧，善良勤奮，無微不至地照顧弟妹及祖父母。

跟著父親一起到田園工作、山上狩獵、河中捕魚，跟爺爺學做醃肉，
分享給親朋好友，所以大家都稱讚他。Yawi’ 的父親說這就是汶水孩
子的特質。以這樣的心與別人交往，加上汶水文化的薰陶，汶水人的
文化必能傳承下去，部落孩子都以 Yawi’ 為榜樣，圓墩部落將會更祥
和。